



PROTOCOL

dalla seduta dil cussegl da vischnaunca,
gievgia, ils 12 da matg 2022, allas 20¹⁵ - 22¹⁵
Liug: Halla Cons

President: Adrian Deflorin

Actuara: Ursina Murer-Fatzer

Presents:

a) Cussegl

Armin Berther	Otmar Flepp
Silvia Bucheli-Caduff	Mario Flepp
Theres Burri Gadola	Larissa Fry Schuster
Roland Cajacob	Giusep Lozza
Edgar Durschei	Ignaz Venzin
Adrian Flepp	

Perstgisas

Helga Probst-Linder	Martino Sabbadini
Armin Manetsch	

b) Suprastonza
communala

René Epp	Jris Lombris
Clemens Berther	Paul Flurin Schmidt
Wendelin Jacomet	

c) Envidai

Walter Deplazes, president dalla cumissiun da meglieraziun
Renaldo Lutz, menader regiunal uffeci d'uaul e prighels dalla natira
Direcziun communala

d) Hosps 10

Plaid d'avertura dil president

Preziai presents

Indoor Festival

Suenter ina pausa dad 11 onns ha giu liug la davosa fin d'jamna la 10avla ediziun digl Indoor Festival. Ina fiasta da giubileum. Ils organisaturs han dau fetg gronda breigia d'organisar quei festival. Als rodund 900 visitaders han els saviu presentar duront dus dis in program musical variont ed interessant cun bands dalla Svizra e Tiaratudestga. L'atmosfera ei stada unica ed ils visitaders han gudiu sper la buna musica era differentas pusseivladads da recreaziun. Cunquei ch'ils organisaturs havevan quintau cun dapli visitaders, ein els uss empau trumpai. Jeu sperel denton fetg ch'els piardien buc il plascher e ch'els organiseschien era el futur igl Indoor Festival.

Project da protecziun encunter curdada da crappa Tuf-Crusch

Sco a vus presents segirefranc enconuschent fa la Via Lucmagn denter Mustér e Medel ils davos onns empau panzieris. Adina puspei ei curdau crappa e blocca giu sin via. Igl ei in cletg ch'ei ha dau entochen oz negins pli gronds accidents. La primavera 2020 ei schizun ina vart dalla via cantunala stada serrada sur plirs meins. Ina situaziun pia pulit malsegira e nuncuntenteivla. Quei fatg ha animau il cussegl da vischnaunca d'inoltrar da gliez temps ina moziun. Avon entgins dis ha la Regenza grischuna finalmein approbau il "Project da protecziun encunter curdada da crappa Tuf-Crusch" e concediu cheutras ina summa da rodund frs. 500'000.-- per augmentar la segirtad dils utilisaders dalla Via Lucmagn. Igl ei previu d'allontanar sin quei tschancun via greppa malsegira e da montar ina reit da protecziun encunter il prighel da crappa. Pia per nus tuts ina fetg buna novitad per migliorar nossa segirtad sin quei tschancun dalla via cantunala.

Investiziuns

Ulteriurs daners dil cantun flessegian el project da promoziun dil svilup regional en la Cadi. Ils suandonts projects vegnan susteni dil Cantun cun ina summa da 2,2 milliuns francs e dalla Confederaziun cun ulteriurs 2,4 milliuns francs, numnadamein per la renovaziun dalla cascharia a Breil, l'engrondaziun dils locals da fatschenta dalla mazlaria Pally a Curaglia sco era aunc pils ulteriurs treis projects. Sper las subvenziuns concedidas e previdas pils ulteriurs gronds projects dalla Cadi; nies Center Fontauna, il Lag Salischinas ed il Bogn Sedrun, pia danovamein ina biala summa che nossa regiun astga retscheiver si da Cuera.

La via per obtener talas subvenziuns ei meinsvart stentusa e pretensiusa, quei san ils pertuccai segir confirmar. Nies sviluppader regional, signur Ruedi Büchi, segida denton bugen per passar cun success quella via e la finfinala saver realisar ils projects previ. Igl impuls ni las ideas per quels projects ston denton vegnir da nus.

Mortoris

Dapi la davosa seduta dil cussegl da vischnaunca ha ei dau quater mortoris:

- Marius Valentin Huonder, naschius ils 27-06-1958 e morts ils 27-04-2022
- Leci Augustin Giger, naschius ils 29-11-1937 e morts ils 06-05-2022
- Alexi Flepp-Stadler, naschius ils 30-07-1933 e morts ils 11-05-2022
- Bischof-Häfelì Christina, naschida ils 20-02-1956 e morta ils 11-05-2022

Naschientschas

Dapi nossa davosa seduta dil cussegl da vischnaunca ha ei dau neginas naschientschas.

Tractandas:

1. Protocol 13-2021/2024
2. Avertura Val Segnas ed Uaul Run: Informaziun (messadi nr. 22-2021/2024)
3. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: L'actuaara:

Adrian Deflorin

Ursina Murer-Fatzer



Cussegl da vischnaunca 2021/2024
Protocol no. 14
Seduta dils 12-05-2022

1. Protocol 13-2021/2024

Decisiun:

Il protocol nr. 13 dalla seduta dils 29 d'avrel 2022 vegn approbaus unanimamein.

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer



2. Avertura Val Segnas ed Uaul Run: Informaziun (messadi nr. 22-2021/2024)

Presentaziun

Gerau Clemens Berther:

Il project da partenza "Avertura Val Segnas – Val Sogn Placi", ch'ei vegnius refusaus ils 29 da november 2020 all'urna cunteneva ina colligiaziun senza interrupziun denter la Val Segnas e la Val Sogn Placi. Las lavurs necessarias cuntenevan per part slargiements da vias existentas e per part construcziuns novas. Il project primar prevedeva la traversada dalla Val Clavaniev. Il trassé menava atras parts dalla zona S3 (*zona per la protecziun dallas fontaunas*). Ina sviaziun da quella zona ei per motivs dalla topografia e dil terren buca pusseivla. Dils cuosts totals da frs. 22'920'000.-- havess la vischnaunca da Mustér giu da surprender la summa da frs. 3'961'400.--.

Cul niev project "Avertura Val Segnas ed Uaul Run" ha la problematica davart las zonas per la protecziun dallas fontaunas saviu vegnir risguardada cun evitar la traversada dalla Val Clavaniev. Il perimeter dil project vegn cheutras repartius en duas parts, numnadamein Uaul Run (*emprema prioritad*) e Val Segnas - Prau Sura. Per la realisaziun da quei project vegn mess en mira ina contribuziun da Confederaziun e Cantun da 69%. Plinavon ha Alpinfra mess en mira da surprender denter 20 e 30% dils cuosts restonts. Plinavon sa vegnir impundiu la summa da frs. 691'000.-- ord il fondo Vivian. Cheutras resta per la vischnaunca la finala ina summa da rodond frs. 5'660'220.--. L'avertura digl Uaul Run sco pli impurtont uaul da protecziun da nossa vischnaunca ei centrala. Senza ina remedura dall'avertura sto la cultivaziun vegnir adattada.

Il meini dalla suprastonza communal ei da buca presentar in'ulteriura gada il project "Val Segnas – Val Sogn Placi", damai che quel ha fatg naufragi. La secunda varianta "Val Segnas – Uaul Run" ei ina buna sligiaziun. La votaziun all'urna duei succeder il november 2022.

Ei suonda la discussiun generala.

Cusseglia Mario Flepp:

Sto la lenna en la Val Clavaniev era el futur vegnir sgulada?

Gerau Clemens Berther:

Tenor explicaziuns dil selvicultur Simon Cathomen sa la vart dretga dalla Val Clavaniev enviers Pardi (*vest*) vegnir sligiada cun sugas. Egl ulteriur territori sto la lenna vegnir sgulada.

Cusseglia Otmar Flepp:

Tgei manegian ils experts presents dalla nova proposta dalla suprastonza communal?

Menader regional uffeci d'uaul Renaldo Lutz:

Ils responsabels lavuran gia dapi 20 onns vid quei project. La varianta presentada ei la secunda megliera a basa dils facturs avon maun. Ils presents san star davos quella sligiaziun per garantir la tgira digl uaul Run. Medemamein ein ils responsabels sfurzai da colaborar maun en maun cun la meglieraziun funsila, gest en la part Val da Cuoz, pertgei la construcziun dalla via sto succeder parallel. Els emprems onns ei da quintar cun in surpli da cuosts. La consequenza finanziaria en connex cun la votaziun dil november 2020 munta ina reducziun da 69% dallas contribuziuns cantunals e federalas.

Selvicultur Simon Cathomen:

Il project "Val Segnas – Uaul Run" perschuada il menaschi forestal. Il temps ei s'avanzaus ed igl ei nerass uras da prender ina decisiun en caussa. Igl uaul da protecziun basegna ina tgira adequata. In aspect impurtont ei era da saver carrar cun maschinas modernas ed adequatas al temps. Buca sco davos ei igl uaul era in plaz da lavur, il qual duei esser in liug segir pils luvrers.

President dalla cumissiun da meglieraziun Walter Deplazes:

Igl onn 2016 ha la vischnaunca da Mustér approbau il project dalla meglieraziun. Il credit da 30 milliuns francs ei cheutras era vegnius concedius (*exclus Mumpé Medel*). El project d'exposiziun dalla meglieraziun ein differentas vias vegnidas integradas sco basa informativa. Quei eran dil reminent tut vias forestalas. Quei ha per consequenza ch'entginas vias da meglieraziun san mo vegnir realisadas sche las vias forestalas vegnan realisadas a temps (*exempel Cuoz*). Ei astga dar negins retardaments per la meglieraziun. Ina via en la Val Segnas ha muort la decisiun dil pievel stuiu vegnir spustada, cunquei ch'ei exista actualmein negin access per quella via. La meglieraziun ei levgiada ch'igl uffeci d'uaul e prighels dalla natira ha viu la necessitad dalla Via Cuoz e ch'els han integrau quella via el project surluvrau "Val Segnas – Uaul Run". Pertgei sche la via forestala vegn buca realisada, sto la meglieraziun exponer il project Via Cuoz. La meglieraziun vegness sfurzada da spluntar tier la vischnaunca per in credit supplementar da rodund 5 milliuns francs. Plinavon füss ei da procurar ch'ils uffecis cantunals e federals approbassen quei credit supplementar. La meglieraziun investescha pli u meins in milliun francs ad onn. Il project surluvraus dalla suprastonza communal e dils uffecis involvi plaidda medemamein en favur dalla meglieraziun funsila.

Cusseglier Roland Cajacob:

La differenza dalla secunda varianta enviers l'emprema ei ch'ins spiarda in flot access sur Segnas enviers Val Sogn Placi senza stuer passar la zona dil vitg. In punct buc aschi legreivel tiel project gest presentau ei il conflict cun la senda da viandar Fuortga – Val Sogn Placi. Dessi aunc in'ulteriura varianta?

Gerau Clemens Berther:

La suprastonza vesa neginas alternativas. Ina varianta sur Latis ei negina opziun.

Cusseglier Edgar Durschei:

Co garanteschans ins igl access per l'agricultura a Marietta? Eis ei veramein necessari da construir ina via per peisas da 40 tonnas (*tschancun Fistatg Lartg – Bletschs*)? San ins buca presentar ina varianta pli favoreivla?

Gerau Clemens Berther:

Il forestalessen enconuscha in'aschinumnada via da Jeep nua ch'ins sa era carrar cun maschinas pli pintgas. Per la via veglia havevan ins calculau ina reserva pil manteniment (*emprem project*).

President dalla cumissiun da meglieraziun Walter Deplazes:

Il project d'exposiziun preveda in'avertura dils praus sur Latis e Claustra naven dil caraun casa Huonder (*Clavaniev*). Igl access sur la Latis ei per la meglieraziun negina opziun.

Menader regional uffeci d'uaul Renaldo Lutz:

Per la construcziun da vias forestalas dat ei duas opziuns q.v.d ina ladezia dil vial da 3.30 meters ni da 3 meters. Sch'ins enconuscha las scarpas teissas digl uaul Run, porta ina reducziun da construcziun da 30 cm negin respargn. Ina cumparegliaziun cun las vias da meglieraziun muossa, ch'ils vehichels ell'agricultura vegnan era buca pli pigns, mobein pli gronds e moderns.

Cusseglier Adrian Flepp:

La projectaziun cuoza ussa dapi 20 onns. Per tgei motivs basegna ei ulteriurs 20 onns per la realisaziun sch'ina migliur d'access fa tonta prescha?

President communal René Epp:

Pils emprems tschun onns occuoran cuosts da rodund frs. 340'000.--/onn e cuosts d'investiziun da rodund frs. 200'000.--/onn. Finanzialmein sa quei project vegnir realisau sur 20 onns cun far las investiziuns necessarias. Era senza il project restan ils cuosts annuals pli u meins en la medema dimensiun, pia negin respargn.

Cusseglier Adrian Flepp:

En cumparegliaziun cul messadi digl onn 2020 figurescha il fondo Vivian ussa cun ina summa pli aulta era sch'il perimeter ei sesminuius. Co declaran ins quella differenza?

Gerau Clemens Berther.

Per risponder vegn surdau il plaid al selvicultur Simon Cathomen:

Il davos quen han ins amplificau il fondo Vivian cun la summa da rodund frs. 80'000.-- ch'ei vegnida transferida dil Cantun per il project "Inslas d'uaul vegl". En in pass han ins installau igl onn 2014 il reservat "Uaul Soliva" che duei promover la biodiversitad. En in secund pass vegn il concept cantunal cun las inslas d'uaul realisau. Pli tard vegnan aunc singulas plantas da habitat definidas egl uaul. Cun quels treis pass completeschan ins il raster denter ils reservats, las inslas e las plantas da habitat.

Cussegliera Silvia Buchli-Caduff

Tgei posiziun pren la Corporaziun d'aua Spina da Vin en quei project niev (*representant en las retschas Aluis Flepp*)?

President dalla Corporaziun d'aua Spina da Vin Aluis Flepp:

La Corporaziun d'aua Spina da Vin ha cheu da prender negina posiziun. Il gerau responsabel Paul Flurin Schmidt sa prender posiziun en caussa.

Gerau Paul Flurin Schmidt:

La varianta surluvrada tanghescha neginas zonas d'aua e cheutras eis ella ina buna sligiazium.

Cussegliera Larissa Fry Schuster:

Per tgei motivs han ins buca persequitau vinavon l'emprema varianta? Daco han ins midau aschi spert sin in'ulteriura varianta? Han ins analisau daco ch'il project ha fatg naufragi?

Gerau Clemens Berther:

Cun la moziun digl anteriur cusseglier Christian Loretz ha la suprastanza giu l'obligaziun d'anflar sligiaziums. Sin fundament dil clar na da 57% han ils responsabels decidu da buca persequitar vinavon quei project "Val Segnas – Val Sogn Placi". Igl uffeci forestal ha beinspert signalisau da porscher maun per ina realisaziun dil project en duas parts q.v.d inagada Uaul Run e silsunter Val Segnas. En la Val Clavaniev han ins anflau neginas sligiaziums per evitar las zonas d'aua.

Cusseglier Armin Berther:

La veglia e decisiun dil pievel ei segirefranc da respectar. Tenor agen meini ei denton gest quella stada la sligiazium optimala. Cun la nova varianta havein nus rodund 1.6 milliuns francs dapli cuosts e contonschin pli pauca surfatscha da raccolta. Plinavon vegn installau el plaun da Faltscharidas il depot da lenna che sesanfla gest sper la via principala. Ei quei in bi maletg per in'entrada dil vitg? Cunzun a Sogn Placi effectuescha la via dapli cuosts da manteniment muort ils numerus carauns. Tiel project Val Segnas – Val Sogn Placi menava la via pli u meins agradora. Cheutras eis ei da ponderar bein co agir. Plinavon vegn supplicau da discussiunar da metter en votaziun duas variantas (*emprema e secunda*) per che la populaziun sappi signalisar sia veglia.

Cussegliera Larissa Fry Schuster:

Ins auda meinsvart resuns da convischin(a)s che tschentan la damonda, sch'ei basegni veramein in tal access en quellas altezias?

Gerau Clemens Berther:

En connex cun la rasena a Sogn Placi resp. Faltscharidas: Cheu anflan ins segirefranc ina sligiazium per ina biala cumparsa per l'entrada dil vitg. La votaziun ei buca vegnida evaluada da gliez temps. Ils responsabels beneventan buca dad ir cun duas variantas avon il pievel.

President communal René Epp:

Il naufragi dalla votaziun san ins era veser ord igl aspect e respect finanziel. Da quei temps ed en in cuort mument ei vegniu presentau al pievel dus projects da gronda dimensiun finanziaria, numnadamein Center Fontauna e l'avertura Val Segnas – Val Sogn Placi.

Cusseglier Ignaz Venzin:

La finfinala eis ei impurtont dad haver in access adequat pigl uaul da schurmetg. Cheutras eis ei necessari da sustener igl agir dalla suprastanza communal.

Cusseglier Mario Flepp:

Pertuccont las zonas d'aua ein plirs pareris d'experts avon maun che san sustener la colligiazium Val Segnas – Val Sogn Placi. Nus stuein esser pertscharts che la colligiazium Val Segnas – Uaul Run cuosta a nus rodund 1.6 milliuns francs dapli. Sch'ins pren en mira la colligiazium Val Segnas – Uaul Run lu eis ei d'evitar ina colligiazium atras Latis. La finala restan ils cuosts da manteniment, seigi quei per ina ni l'otra varianta.

Cusseglier Adrian Flepp:

In'avertura per la tgira digl uaul Run ei da gronda impurtonza. Ir all'urna cun duas variantas ei buca da beneventar.

Cussegliera Theres Burri Gadola:

Uaul da schurmetg ed auas ein duas tematicas essenzialas. La votaziun digl onn 2020 ha mussau che las auas ei ina tematica fetg delicata. Plinavon ha la divergenza denter la Corporaziun d'aua Spina da Vin e la suprastonza communal segirefranc giu ina gronda influenza sil resultat dalla votaziun. Il project Val Segnas – Uaul Run sligia la problematica dallas auas. Las votantas ed ils votants ston semplamein vegnir informai detagliadamein davart l'impurtonza d'ina tala colligiazium egl uaul da schurmetg.

Cusseglier Giusep Lozza:

Ils cuosts annuals per la tgira d'auaul, raccolta da lenna senza avertura muntan gia oz a frs. 341'000.--. Suenten la realisaziun dil project Val Segnas – Uaul Run muntan tals aunc frs. 231'000.--/onn. Il fatg ei denton ch'ils cuosts da manteniment da frs 341'000.--/onn restan era duront la construcziun dalla via (*ca. 20 onns*) e vitier vegnan aunc ils cuosts annuals da frs. 190'000.--. Suenten cons onns san ils responsabels sminuir ils cuosts?

Avertura Val Sogn Placi: Han ins risguardau tier ils cuosts da construcziun ils prighels da quella val (*lavinas, zona cotschna, evtl. rinforzaments etc.*).

Gerau Clemens Berther:

Suenten la realisaziun dil project resulta in respargn annual da frs. 6'000.--. L'avertura succeda en dus loghens, numnadamein Val da Cuoz – Segnas. Cheutras sa era la via dalla meglieraziun funsila vegnir realisada parallelmein. Aschispert che l'avertura ei avon maun, sa la tgira digl uaul succeder.

Naven digl atun entochen la primavera e gest tenor aura vegn raccoltau negina lenna ord la Val Sogn Placi. Pertuccont il rempar ston ils responsabels setener vid prescripziuns fetg severas.

Cusseglier Roland Cajacob:

L'emprema varianta vegn favorisada vinavon, denton ei sto vegnir cuntinuau cun quei project. Cheutras purtein nus la responsablada da perschuer votant(a)s pil project Val Segnas – Uaul Run.

Cusseglier Otmar Flepp:

Pliras gadas eis ei vegniu menziunau l'impurtonza digl uaul sco schurmetg pils habitadis, nies vitg. Cheutras setschenta la damonda, daco vegn lu baghegiu ina casa suenter l'otra gest viaden en quellas spundas prigulusas?

Gerau Clemens Berther:

Las zonas da baghegiar ein vegnidadas lubidas en differents pareris e da differents uffecis. Pli da baul possedevan ins buca segiradas da tut gener sco ozildi. Negligir diltuttatfatg il manteniment digl uaul ha baul ni tard nauschas consequenzas.

Cussegliera Larissa Fry Schuster:

Tenor plans presenta la via dabia carauns stretgs. En tgei dimensiun semovan ils cuosts nunprevedi per la construcziun da quels carauns? San ins carrar sin quella via da tut temps, pia da tutt'aura?

Menader regional uffeci d'auaul Renaldo Lutz:

Ils carauns anetgs (*Wendeplatten, 180°*) vegnan ozildi rinforzai cun ina platta da betun. La pendenza dalla via existenta resta e per la via nova quantan ins pendenzas maximalas da 14-16%. (*sfida cava Berther -Fuortga*) e che basegna cheutras ina cuvrada adeguata. In'ulteriura sfida vegn la via dalla meglieraziun ad esser, numnadamein naven dalla via cantunala entochen tier la cava Berther. Leu ston ins realisar la via cun meins pendenza che actualmein. Igl access ei garantius da tut temps auter ch'el cass da prighels da lavinas (*nevadas*).

Votaziun consultativa

Cusseglieras e cusseglieirs decidan cun nov encunter treis vuschs da presentar al pievel ina varianta, numnadamein "Val Segnas – Uaul Run" e da cheutras sustener la proposta dalla suprastanza communal.

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer



3. Ura da damondas (conform ad art. 44 dil regulativ da fatschentas)

Igl ei vegniu inoltrau ina damonda a scret.

Cusseglie Ignaz Venzin:

"Ils 26 da matg 2020 ha il cantun Grischun incaricau la ARG cun l'organisaziun ed introducziun dallas gruppas da First Responder+. La lavur dil First Responder ei da segidar en cass d'accidents e da disgrazias entochen ch'igl agid professional ei sil plaz. Da principi eis ei pusseivel da recrutar las persunas cun las qualificaziuns pretendidas en cuort temps – organisar il material e prender en funcziun la gruppa el decuors digl atun 2022. Da menziunar ei che quei survetsch caschuna negins cuosts allas vischnauncas. Bugen udessel la tenuta dalla suprastanza communal en caussa. Ei il sustegn politic avon maun?"

President communal René Epp:

Il salvament alpin "ARG" ei actualmein vid l'organisaziun en las differentas vischnauncas e regiuns. Cunzun eis ei impurtont da segirar pli spert e professional igl agid en las regiuns periferas e muntagnardas. En quei project vegn era la problematica dil 144 analisaus. Finamira ei da garantir agid professional al liug. La suprastanza communal sustegn e porscha maun a quei project.

Communicaziuns

President communal René Epp:

- La carta d'indigens 2022 sa vegnir retratga al spurtegl dall'administraziun communal. Naven dil zercladur entochen fin october 2022 han indigen(a)s la pussevividad da far diever dallas pendicularas e quei tschun dis.
- Ils 15 da matg; fin d'jamna d'elecziuns cantunales sco era votaziuns federalas ed ina votaziun communal.
- Ils 25 da matg ha liug per in e scadin la fiasta da giubileum 50 onns Pendicularas Mustér (*grillada*), naven dallas 16⁰⁰ sigl areal dil Catrina Resort (*act official allas 17⁰⁰*).

Gerava Jris Lombris:

- Naven da venderdis, ils 20 da matg vegn installau sil parcadi dalla halla Cons in "Pumptrack". Cheutras resta il parcadi serraus e quei per treis jamnas.
- Ils 16 da zercladur ein convischin(a)s cordialmein envidai alla sentupada dallas vischnauncas da Tujetsch, Medel e Mustér si Stagias. La scuntrada entscheiva allas 16⁰⁰ ed in bus vegn a cursar naven da Mustér entochen Stagias. L'occurrenza ha liug mo da bialaura.
- Las entradas pil pupi che vegn rimnaus a Raveras vegn dabien alla scola populara Mustér.

Gerav Wendelin Jacomet:

- Ils 26 da matg ha liug en la sala Peter Kaiser, Claustra Mustér, l'informaziun publica davart il project "la pendentia".

President dil cussegl Adrian Deflorin:

- La fin d'jamna dils 21 e 22 matg ha liug en halla Cons il concert primavaun dalla Societad da musica Mustér.
- Igl emprem da zercladur ha liug il di d'informaziun davart la professiun tier la Distec SA.

Il proxim cussegl da vischnaunca ha liug mesjamna, ils 22 da zercladur 2022 (*extra muros*).

Cussegl da vischnaunca Disentis/Mustér
Il president: L'actuara:

Adrian Deflorin

Ursina Murer-Fatzer

Disentis/Mustér, ils 29 da matg 2022